

## Uka'in MalasBunun?

Miliskin aak tu makuaq dau ki uka'in imita qalinga? Mavia aak tu maupa ti miliskin i? Masailang aak uvavaz'az tu makuaq dau aingkun malka malasBunun tu sinkuzakuza? Mavia tu asnit u isnavaan? Mavia tu asnit u malasBunun bazbaz? Mavia dau mita qalinga tu namusqu min'uka i?

Maaq i uka'in a imita qalinga, namaszangin ata lisav kaliskusbaiun i luvluv, uka duma siduq asa suklam mita, musqa ata pandazudazu ihaan duma siduq. Kinuzin a matubulsukin, namaszang lisav tu lananastu haan dalaq minpuhuq, sizaunin i bunun matakunav mapistaba. Aupa min'uka'in mita tanqapu' na'isiqu mis tu qalinga.

Mavia ka malasBunun tu namin'uka i? Miliskinang tu muqa ata Bunun siduq hima suqis saba bunun, papiaq a mazima malaBunun pababazbaz? Tau suqis saba? Matiunsaba? Tau saba? Matiun? Duuq i lusqa'in tatau? Tastulumaq malasTaulu'in amin pababazbaz, haizang a malasPuut, malasNgaingai. Malalabas madadaingaz a ni'in masnava uvavaz'az malasBunun, mainduuaz masalaqit amin malasBunun. Maaq i maupin ti ata a, haizang mita qabasin a qalinga un? Na Uka'in!

Maaq a uvavaz'az siin mainduuaz a, makunivin a is'aang. Aupa maqtu malas duma siduq tu qalinga pababazbaz. Pasunkaviaz duma siduq, a

maz'av malasBunun. Aupa maz'av kansaipunin i duma bunun tu Bunun qaan aak. Haiza ata a asnit u malasBunun. Aupa na'uka bunun suklam, uka bunun mazima. Maupa ta? Haiza tu qanian, qansaipun aak bunun tu Takisilazan aak tu miniqu mis. Masingav aipa zaku tu niap aas malasBunun? Antalamuk tu, niap aak MalastakiVatan. Taqu aipa zaku tu, madia ka Bunun nitu tupa tu nitu niap malasBunun, tupa dau aingka tu asni i malasBunun. Aupa madaing a kaikaz'avan ikunbu is'aang naak.

Ihaan aak ka'ku masnava malasBunun, sia vaivi siduq tu pantu a malalabas, u'asa'an aingka minqansiap, mahaipi isnava'an; maaq a Bunun uvavaz'az a, atikisang tuza ka kaiqansaipan a, katupa'in tu qasaipunin amin. Nit u maqasmav isnavaan, matamal a is'aang, lmuqa sia istuqaqamqam, ipali'a'aza tu isbabazbaz a asaun. Haiza ka minmananu asnit u isnavaan.

Tupa a madadaingaz tu, na musuqis ata tutupa munhaan mai'asang qabasin. Aupa nanu mita i'ita a dangi'anan, i'ita ka maimadadaingaz maltatala mita. Namakuaq ata pasadu u, pababaz? Na tauplangan ata mapudaan. Aupa ni'in ata tauksisia Bunun tu miniqu mis..

115 年全國語文競賽臺灣原住民族語言朗讀文章 【丹群布農語】 國中學生組 編號 2 號

布農族語消失了？

我們的話消失後，將會如何？布農人口只有五萬人，有多少人使用布農語？年輕人不說族語，語言還會存在嗎？年輕人怕被發現是布農族人，不願意說布農族語，因為會沒有人理睬。布農族語課程，有很多其他族群的學生，他們渴望學得，容易受教；布農族的孩童們，以為什麼都懂，心裡隨便。

先人們說我們都必回故鄉。那是我們的駐地，他們在那等著我們。我們將如何見面、說話？